



NEGERI KEDAH DARUL AMAN

# Warta Kerajaan

DITERBITKAN DENGAN KUASA

*GOVERNMENT OF KEDAH DARUL AMAN GAZETTE*

*PUBLISHED BY AUTHORITY*

Jil. 62  
No. 5

**28hb Februari 2019**

*TAMBAHAN No. 2  
PERUNDANGAN*

**K. P.U. 2.**

## AKTA KERAJAAN TEMPATAN 1976

UNDANG-UNDANG KECIL PASAR BORONG  
(PIHAK BERKUASA TEMPATAN NEGERI KEDAH) 2019

### SUSUNAN UNDANG-UNDANG KECIL

#### BAHAGIAN I

#### PERMULAAN

Undang-undang kecil

1. Nama, permulaan kuat kuasa dan pemakaian
2. Tafsiran

#### BAHAGIAN II

#### PASAR BORONG AWAM

3. Lesen pasar borong awam
4. Permohonan lesen pasar borong awam



Undang-undang kecil

27. Notis pemberitahuan
28. Penyerahan lesen pasar borong persendirian
29. Meja, *dsb.* untuk mempamerkan barang-barang
30. Bilik sejuk di pasar borong persendirian
31. Pencahayaan dan pengalihan udara
32. Waktu perniagaan

#### BAHAGIAN IV

##### PENGENDALIAN DAN PENYIMPANAN BARANG-BARANG

33. Kehendak bagi pengendalian dan penyimpanan barang-barang

#### BAHAGIAN V

##### PELBAGAI

34. Lesen hendaklah dipamerkan
35. Penjualan barang-barang yang tidak menyihatkan, *dsb.* tidak dibenarkan
36. Kacau ganggu
37. Pemeriksaan kesihatan
38. Orang yang dilarang
39. Kebersihan
40. Kebersihan diri
41. Penyediaan tong sampah dan pelupusan sampah
42. Racun perosak dilarang
43. Tiada tanggungan atas pegawai
44. Mengkompaun kesalahan
45. Penalti

JADUAL

## AKTA KERAJAAN TEMPATAN 1976

UNDANG-UNDANG KECIL PASAR BORONG  
(PIHAK BERKUASA TEMPATAN NEGERI KEDAH) 2019

PADA menjalankan kuasa yang diberikan oleh seksyen 73 Akta Kerajaan Tempatan 1976 [Akta 171] Pihak Berkuasa Tempatan Negeri Kedah Darul Aman dengan ini membuat, dan menurut seksyen 103 Akta tersebut, Pihak Berkuasa Negeri mengesahkan undang-undang kecil yang berikut:

## BAHAGIAN I

## PERMULAAN

**Nama, permulaan kuat kuasa dan pemakaian**

1. (1) Undang-undang kecil ini bolehlah dinamakan **Undang-Undang Kecil Pasar Borong (Pihak Berkuasa Tempatan Negeri Kedah) 2019**.

(2) Undang-Undang Kecil ini hendaklah mula berkuat kuasa pada tarikh ianya disiarkan dalam *Warta*.

(3) Undang-Undang Kecil ini hendaklah terpakai bagi semua kawasan Pihak Berkuasa Tempatan Negeri Kedah Darul Aman.

**Tafsiran**

2. Dalam Undang-Undang Kecil ini, melainkan jika konteksnya menghendaki makna yang lain—

“bahan sayuran” ertinya apa-apa pokok atau bahagian sesuatu pokok sebagaimana yang dinyatakan dalam Akta Makanan 1983 [Akta 281];

“barang-barang” ertinya daging, ikan, buah, sayur atau apa-apa barang lain tidak kurang daripada 3 kilogram bagi barang basah dan 3 unit ke atas bagi barang kering sebagaimana yang ditentukan oleh Majlis;

“borong” ertinya penjualan barang-barang kepada peruncit bagi maksud perdagangan;

“buah” termasuklah apa-apa hasil yang disediakan daripada buah;

“daging” ertinya daging atau hasil daging sebagaimana yang dinyatakan dalam Peraturan-Peraturan Makanan 1985 [P.U(A) 437/1985];

“Datuk Bandar” ertinya Datuk Bandar Majlis Bandaraya Alor Setar dan termasuklah Timbalan Datuk Bandar;

“ikan” ertinya apa-apa hidupan haiwan atau tumbuhan akuatik sebagaimana yang dinyatakan dalam Peraturan-Peraturan Makanan 1985 [P.U(A) 437/1985];

“lesen pasar borong persendirian” ertinya suatu lesen pasar borong persendirian yang dikeluarkan di bawah undang-undang kecil 21;

“lesen pasar borong awam” ertinya lesen pasar borong awam yang dikeluarkan di bawah undang-undang kecil 4;

“Majlis” ertinya Majlis Bandaraya, Majlis Perbandaran, Majlis Daerah dan Pihak Berkuasa Tempatan Taman Perindustrian Hi-Tech Kulim;

“pasar borong awam” ertinya sesuatu pasar borong yang dimiliki, dipajak atau disenggarakan oleh Majlis;

“pasar borong persendirian” ertinya sesuatu pasar borong selain pasar borong awam;

“pembantu” ertinya seseorang yang diambil bekerja oleh seorang pemegang lesen pasar borong awam dengan kelulusan Pihak Berkuasa Melesen di bawah undang-undang kecil 13;

“pegawai kesihatan” ertinya pegawai yang pada masa itu menjalankan kewajipan-kewajipan seseorang Pegawai Kesihatan sesuatu Pihak Berkuasa Tempatan dan termasuklah seseorang Penolong Pegawai Kesihatan.

“pegawai yang diberi kuasa” ertinya mana-mana pegawai Majlis yang diberi kuasa secara bertulis oleh Datuk Bandar atau Yang Dipertua;

“Pihak Berkuasa Melesen” ertinya Datuk Bandar atau Yang Dipertua atau Setiausaha atau Pegawai Kesihatan Majlis atau mana-mana pegawai yang diberi kuasa secara bertulis oleh Datuk Bandar atau Yang Dipertua;

“pemegang lesen” ertinya—

- (a) seseorang yang dilesenkan di bawah undang-undang kecil 4 untuk menjual atau menawarkan untuk jualan apa-apa barang di pasar borong awam; dan
- (b) seseorang yang dilesenkan di bawah undang-undang kecil 21 untuk menubuhkan, mengendalikan atau menjalankan suatu pasar borong persendirian;

“penama” ertinya seseorang yang dinamakan oleh seorang pemegang lesen pasar borong awam di bawah undang-undang kecil 12 dengan kelulusan Pihak Berkuasa Melesen untuk menguruskan perniagaan pemegang lesen pasar borong awam itu selama tempoh pemegang lesen pasar borong awam itu tidak ada di gerainya;

“pihak berkuasa berkenaan” ertinya Perbadanan Pengurusan Sisa Pepejal dan Pembersihan Awam yang ditubuhkan di bawah Akta Pengurusan Sisa Pepejal dan Pembersihan Awam 2007 [Akta 672];

“Setiausaha” ertinya setiausaha bagi setiap Pihak Berkuasa Tempatan di Negeri Kedah Darul Aman; dan

“Yang Dipertua” ertinya orang yang pada masa itu menjalankan kewajipan-kewajipan jawatan Yang Dipertua dan termasuklah Timbalan Yang Dipertua;

## BAHAGIAN II

### PASAR BORONG AWAM

#### **Lesen pasar borong awam**

3. Tiada seorang pun boleh menjual atau menawarkan untuk jualan apa-apa barang di sesuatu pasar borong awam tanpa suatu lesen pasar borong awam yang dikeluarkan oleh Pihak Berkuasa Melesen di bawah Undang-Undang Kecil ini.

#### **Permohonan lesen pasar borong awam**

4. (1) Sesuatu permohonan bagi lesen pasar borong awam hendaklah dibuat secara bertulis kepada Datuk Bandar atau Yang Dipertua dalam apa-apa borang dan mengikut apa-apa cara yang ditentukan oleh Majlis.

(2) Majlis hendaklah menimbangkan permohonan lesen pasar borong awam di bawah perenggan (1) dan boleh meluluskan atau menolak permohonan itu.

(3) Apabila Majlis meluluskan permohonan lesen pasar borong awam di bawah perenggan (2), suatu lesen hendaklah dikeluarkan—

- (a) dalam apa-apa bentuk dan tertakluk kepada apa-apa syarat atau sekatan sebagaimana yang dinyatakan oleh Majlis;
- (b) apabila dibayar fi sebagaimana yang dinyatakan dalam Jadual; dan
- (c) atas asas tahunan dan boleh dilanjutkan sehingga tempoh maksimum tidak melebihi tiga tahun bagi satu lesen.

(4) Sesuatu lesen pasar borong awam yang dikeluarkan di bawah Undang-Undang Kecil ini boleh diperbaharui tertakluk kepada pembayaran fi sebagaimana yang dinyatakan dalam Jadual, tiga puluh hari sebelum tamat tempoh lesen itu.

(5) Jika Majlis menolak permohonan di bawah perenggan (2), Majlis hendaklah memberi pemohon alasan bagi penolakan itu.

#### **Lesen tidak boleh dikeluarkan kepada orang yang di bawah umur lapan belas tahun**

5. Tiada lesen pasar borong awam boleh dikeluarkan kepada mana-mana orang yang di bawah umur lapan belas tahun.



**Lesen pasar borong awam tidak boleh diserahkan atau dipindahmilik**

6. Tiada lesen pasar borong awam boleh diserahkan atau dipindahkan hakmilik kepada orang lain tanpa kebenaran bertulis daripada Pihak Berkuasa Melesen.

**Lesen pasar borong awam hendaklah berkenaan dengan gerai tertentu**

7. (1) Sesuatu lesen pasar borong awam yang dikeluarkan di bawah undang-undang kecil 4 hendaklah berkenaan dengan sesuatu gerai tertentu sebagaimana yang dinyatakan dalam lesen itu.

(2) Walau apapun perenggan (1), Pihak Berkuasa Melesen boleh, menurut budi bicaranya, atas suatu permohonan yang dibuat oleh seseorang pemegang lesen pasar borong awam, membenarkan pemindahan tapak mana-mana gerai di dalam kawasan pasar borong itu yang menjual barang yang serupa tertakluk kepada pembayaran fi yang dinyatakan dalam Jadual.

**Penentuan jenis barang-barang untuk jualan**

8. Seseorang pemegang lesen pasar borong awam tidak boleh menjual atau menawarkan untuk jualan di sesuatu pasar borong awam apa-apa barang kecuali—

- (a) barang-barang yang dinyatakan dalam lesen itu; dan
- (b) di gerai yang mengenainya dia telah diberikan suatu lesen oleh Pihak Berkuasa Melesen.

**Pembatalan lesen**

9. Pihak Berkuasa Melesen boleh tanpa memberi apa-apa sebab, pada bila-bila masa, membatalkan mana-mana lesen jika pemegang lesen pasar borong awam gagal mematuhi mana-mana peruntukan Undang-Undang Kecil ini atau syarat-syarat atau sekatan-sekatan lesen itu.

**Pemegang lesen pasar borong awam hendaklah menyerahkan lesen semasa pembatalan**

10. Pemegang lesen pasar borong awam hendaklah menyerahkan lesennya kepada Pihak Berkuasa Melesen apabila ia dibatalkan.

**Penggantian lesen**

11. (1) Jika Pihak Berkuasa Melesen berpuas hati bahawa mana-mana lesen pasar borong awam yang dikeluarkan di bawah Bahagian ini telah hilang, cacat atau rosak, Pihak Berkuasa Melesen boleh mengeluarkan suatu lesen gantian apabila dibayar fi yang dinyatakan dalam Jadual.

(2) Dalam hal sesuatu lesen yang cacat atau rosak, lesen gantian hanya boleh dikeluarkan setelah lesen yang telah rosak itu diserahkan kepada Pihak Berkuasa Melesen untuk dibatalkan.

---

**Pemegang lesen pasar borong awam dikehendaki hadir di gerai dan pelantikan penama semasa ketiadaannya**

12. (1) Seseorang pemegang lesen pasar borong awam hendaklah pada setiap masa hadir dan menguruskan perniagaan di gerainya.

(2) Tertakluk kepada perenggan (3), Pihak Berkuasa Melesen boleh mengecualikan mana-mana pemegang lesen pasar borong awam daripada kehendak perenggan (1) jika ia berpuas hati dengan sebab-sebab yang diberikan oleh pemegang lesen pasar borong awam itu dan Pihak Berkuasa Melesen boleh membenarkan—

(a) mana-mana orang yang diambil bekerja sebagai pembantu di bawah undang-undang kecil 13 untuk mengendalikan perniagaan itu bagi pihak pemegang lesen pasar borong awam itu selama tempoh ketiadaan pemegang lesen pasar borong awam itu; atau

(b) gerai itu hendaklah ditutup sementara.

(3) Seseorang pemegang lesen pasar borong awam hendaklah, jika dia tidak dapat menguruskan perniagaannya selama tempoh lebih tiga puluh hari, memohon secara bertulis kepada Pihak Berkuasa Melesen untuk menamakan seseorang untuk mengambil tempatnya selama tempoh ketiadaannya.

(4) Sesuatu permohonan di bawah perenggan (3) hendaklah—

(a) menyatakan nama, alamat terbaru dan nombor kad pengenalan orang yang dicadangkan hendak dinamakan itu; dan

(b) disertakan dengan sekeping gambar terbaru berukuran pasport orang itu.

(5) Pihak Berkuasa Melesen boleh—

(a) meluluskan permohonan yang dibuat di bawah perenggan (4) selama apa-apa tempoh yang difikirkannya patut; atau

(b) menolak permohonan itu atau menghendaki pemohon supaya mengemukakan maklumat lanjut.

(6) Jika Pihak Berkuasa Melesen meluluskan permohonan di bawah subperenggan (5)(a), pemegang lesen pasar borong awam itu hendaklah mengemukakan lesennya kepada Pihak Berkuasa Melesen bagi maksud memasukkan butir-butir mengenai penama ke dalam lesen itu dan membayar fi yang dinyatakan dalam Jadual.

(7) Seseorang penama hendaklah tertakluk kepada Undang-Undang Kecil ini dan mempunyai tanggungan yang sama sebagaimana pemegang lesen pasar borong awam.



### **Pengambilan seorang pembantu**

13. (1) Seseorang pemegang lesen pasar borong awam tidak boleh mengambil bekerja mana-mana pembantu tanpa mendapat kelulusan bertulis Pihak Berkuasa Melesen terlebih dahulu.

(2) Sesuatu permohonan bagi suatu kelulusan di bawah perenggan (1) hendaklah—

- (a) dibuat secara bertulis kepada Majlis;
- (b) menyatakan nama, alamat terbaru dan nombor kad pengenalan orang yang dicadangkan untuk diambil bekerja; dan
- (c) disertakan dengan sekeping gambar terbaru berukuran pasport orang itu.

(3) Pihak Berkuasa Melesen boleh meluluskan atau menolak permohonan yang dibuat di bawah perenggan (2).

(4) Jika Pihak Berkuasa Melesen meluluskan permohonan di bawah perenggan (2), pemegang lesen pasar borong awam hendaklah mengemukakan lesennya kepada Pihak Berkuasa Melesen bagi maksud memasukkan butir-butir mengenai pembantu itu ke dalam lesen itu.

(5) Seseorang pemegang lesen pasar borong awam hendaklah bertanggung ke atas perbuatan pembantunya dan disifatkan telah membenarkan perbuatan itu.

(6) Melainkan jika seseorang pemegang lesen pasar borong awam membuktikan bahawa perbuatan itu dilakukan tanpa pengetahuannya atau pembiarannya atau bahawa dia telah mengambil segala langkah berjaga-jaga yang munasabah atau bahawa dia telah mengambil usaha yang wajar bagi mengelakkan berlakunya perbuatan demikian.

### **Pembesar suara, *dsb.* tidak boleh digunakan**

14. Seseorang pemegang lesen pasar borong awam tidak boleh menggunakan pembesar suara, pelaung suara, mikrofon atau apa-apa peralatan lain untuk menguatkan apa-apa bunyi dalam menjalankan perniagaannya.

### **Bekas barang-barang**

15. (1) Dalam mengendalikan barang-barang, seseorang pemegang lesen pasar borong awam hendaklah menggunakan hanya bekas-bekas yang diluluskan oleh Majlis.

(2) Pihak Berkuasa Melesen boleh menyita, memusnahkan atau melupuskan apa-apa bekas yang digunakan oleh seseorang pemegang lesen pasar borong awam yang tidak diluluskan oleh Majlis.

(3) Pemunya apa-apa bekas yang telah disita, dimusnahkan atau dilupuskan oleh Pihak Berkuasa Melesen tidak berhak untuk membuat apa-apa tuntutan dan mana-mana barang yang disita, dimusnahkan atau dilupuskan adalah di atas risiko pemunyanya.

### **Memuatkan atau memunggah barang**

16. (1) Seseorang tidak boleh memuatkan atau memunggah apa-apa barang dan benda lain dalam sesuatu pasar borong awam selain mengikut masa dan di tempat yang ditentukan oleh Pihak Berkuasa Melesen.

(2) Seseorang tidak boleh meninggalkan kenderaannya bagi jangka masa yang lebih lama daripada yang diperlukan untuk memuatkan atau memunggah barang-barang di tempat yang disebut dalam perenggan (1).

### **Kawalan kenderaan yang memasuki pasar borong awam**

17. Tiada seorang pun boleh—

- (a) meletakkan kenderaan di mana-mana tempat selain daripada di tempat yang ditetapkan untuk meletakkan kenderaan dalam kawasan pasar borong awam; dan
- (b) menghalang atau mengganggu kelancaran arus lalu lintas kenderaan di pasar borong awam.

### **Halangan, penyitaan dan tahanan**

18. (1) Tiada perkakas atau bejana boleh disimpan atau diletak atau menyebabkan diletakkan dalam bahagian pemborongan apa-apa barang, bahan atau benda dalam pasar borong awam semasa dan selepas waktu perniagaan sehingga menyebabkan suatu halangan.

(2) Mana-mana orang tidak boleh meletakkan apa-apa barang atau benda di atas kaki lima, tempat awam atau di mana-mana bahagian pasar borong awam yang akan menyebabkan halangan.

(3) Mana-mana orang yang melanggar Undang-Undang Kecil ini adalah melakukan suatu kesalahan.

(4) Pegawai yang diberi kuasa atau Pegawai Kesihatan boleh menyita dan menahan apa-apa barang, bahan atau benda mudah rosak yang sedemikian di suatu tempat yang ditentukan oleh Pihak Berkuasa Melesen dan selepas itu apa-apa barang, bahan atau benda atau benda yang sedemikian boleh, sehingga dituntut semula oleh pemegang lesen pasar borong awam di bawah perenggan (5) undang-undang kecil ini, berada di bawah penjagaan Majlis tetapi segala risiko adalah di bawah tanggungan pemegang lesen pasar borong awam.

(5) Mana-mana orang yang mempunyai apa-apa tuntutan terhadap mana-mana barang di bawah Undang-Undang Kecil ini boleh menuntut barang-barang tersebut daripada Pihak Berkuasa Melesen dalam tempoh 24 jam bagi barangan mudah rosak dan tiga hari dari tarikh penyitaan bagi barang tidak mudah rosak, tertakluk kepada apa-apa syarat yang dikenakan oleh Majlis dan kepada pembayaran kompaun yang ditentukan oleh Majlis. Majlis tidak akan bertanggungjawab di atas kerosakan barang-barang yang disita yang berada di dalam simpanan Majlis.

(6) Dengan syarat bahawa jika tidak ada tuntutan dibuat ke atas mana-mana barang sitaan di bawah perenggan (5) selepas tempoh tiga hari, Majlis boleh melupuskan barang-barang tersebut dengan apa-apa cara yang difikirkan sesuai.

(7) Walau apa pun peruntukan dalam perenggan (6), mana-mana pegawai yang diberi kuasa atau Pegawai Kesihatan tidak boleh menyita apa-apa barang mudah rosak kecuali dengan notis mengarahkan pemegang lesen pasar borong awam memindahkan barang-barang berkenaan dalam tempoh yang ditetapkan dalam notis telah diserahkan kepada pemegang lesen pasar borong awam itu dan dia gagal berbuat demikian.

(8) Apa-apa barang mudah rosak yang disita selepas notis diserahkan di bawah perenggan (7), boleh dilupuskan mengikut mana-mana cara yang ditentukan oleh Majlis.

### **Waktu perniagaan**

19. Waktu perniagaan pasar borong awam adalah bermula dari jam 2.00 pagi hingga 10.00 pagi dan seseorang pemegang lesen pasar borong awam dilarang menjalankan perniagaan di luar waktu perniagaan itu.

## **BAHAGIAN III**

### **PASAR BORONG PERSENDIRIAN**

#### **Lesen pasar borong persendirian**

20. (1) Tiada seorang pun boleh menubuhkan, mengendalikan atau menjalankan suatu pasar borong persendirian di mana-mana tempat tanpa suatu lesen pasar borong persendirian yang dikeluarkan oleh Pihak Berkuasa Melesen di bawah Undang-Undang Kecil ini.

(2) Tiada lesen boleh dikeluarkan bagi pasar borong persendirian yang terletak dalam lingkungan satu kilometer daripada pasar borong awam.

#### **Permohonan bagi lesen pasar borong persendirian**

21. (1) Sesuatu permohonan bagi suatu lesen pasar borong persendirian bagi penjualan barang-barang yang dinyatakan dalam permohonan hendaklah dibuat secara bertulis kepada Datuk Bandar atau Yang Dipertua dalam apa-apa borang dan mengikut apa-apa cara sebagaimana yang ditentukan oleh Majlis.



(2) Majlis—

(a) hendaklah mempertimbangkan permohonan yang dibuat di bawah perenggan (1); dan

(b) boleh meluluskan atau menolak permohonan itu.

(3) Jika Majlis meluluskan permohonan di bawah perenggan (2), suatu lesen pasar borong persendirian hendaklah dikeluarkan—

(a) dalam apa-apa bentuk sebagaimana yang ditentukan oleh Majlis;

(b) tertakluk kepada apa-apa syarat atau sekatan yang difikirkan patut oleh Majlis;

(c) apabila dibayar fi sebagaimana yang dinyatakan dalam Jadual; dan

(d) selama apa-apa tempoh yang tidak melebihi dua belas (12) bulan dan boleh diperbaharui tertakluk kepada pembayaran fi sebagaimana yang dinyatakan dalam Jadual pada atau sebelum tarikh habis tempoh lesen itu.

**Lesen tidak boleh dikeluarkan kepada orang yang di bawah umur lapan belas tahun**

22. Tiada lesen pasar borong persendirian boleh dikeluarkan kepada mana-mana orang yang di bawah umur lapan belas tahun.

**Lesen pasar borong persendirian tidak boleh diserahkan atau dipindah milik**

23. Tiada lesen pasar borong persendirian boleh diserahkan atau dipindahkan hakmilik kepada orang lain tanpa kebenaran bertulis daripada Pihak Berkuasa Melesen.

**Pembatalan lesen**

24. Pihak Berkuasa Melesen boleh tanpa memberi apa-apa sebab, pada bila-bila masa, membatalkan mana-mana lesen jika pemegang lesen pasar borong persendirian gagal mematuhi mana-mana peruntukan Undang-Undang Kecil ini atau syarat-syarat atau sekatan-sekatan lesen itu.

**Penggantian lesen**

25. (1) Jika Pihak Berkuasa Melesen berpuas hati bahawa mana-mana lesen pasar borong persendirian yang dikeluarkan di bawah Bahagian ini telah hilang, cacat atau rosak Pihak Berkuasa Melesen boleh mengeluarkan suatu lesen gantian apabila dibayar fi yang dinyatakan dalam Jadual.

(2) Dalam hal sesuatu lesen yang cacat atau rosak, lesen gantian hanya boleh dikeluarkan setelah lesen yang telah rosak itu diserahkan kepada Pihak Berkuasa Melesen untuk dibatalkan.

### **Fi tidak boleh dibayar balik**

26. Fi yang dibayar bagi sesuatu lesen pasar borong persendirian tidak boleh dikembalikan jika pemegang lesen berhenti mengendalikan pasar borong persendirian itu sebelum tamat tempohnya.

### **Notis pemberitahuan**

27. Seseorang pemegang lesen pasar borong persendirian hendaklah memberitahu Pihak Berkuasa Melesen secara bertulis sebaik sahaja dia telah berhenti mengendalikan suatu pasar borong persendirian.

### **Penyerahan lesen pasar borong persendirian**

28. Pemegang lesen pasar borong persendirian hendaklah menyerahkan lesennya kepada Pihak Berkuasa Melesen apabila beliau telah berhenti mengendalikan perniagaan atau apabila lesen itu dibatalkan di bawah undang-undang kecil 24.

### **Meja, dsb. untuk mempamerkan barang-barang**

29. Semua meja, kaunter, bangku panjang atau bekas peraga yang digunakan untuk mempamerkan barang-barang untuk jualan atau yang ditawarkan untuk jualan hendaklah ditentukan oleh Pihak Berkuasa Melesen.

### **Bilik sejuk di pasar borong persendirian**

30. (1) Seseorang pemegang lesen pasar borong persendirian hendaklah mengadakan suatu bilik sejuk di pasar borong persendirian mengikut pelan dan spesifikasi yang diluluskan oleh Pihak Berkuasa Melesen.

(2) Pemegang lesen pasar borong persendirian hendaklah pada setiap masa menyenggara bilik sejuk itu dalam keadaan baik dan boleh digunakan dengan efisien.

(3) Pemegang lesen pasar borong persendirian hendaklah memastikan bahawa barang-barang yang disimpan di dalam bilik sejuk—

(a) bersih, baik dan bebas daripada pencemaran;

(b) disusun dengan teratur di dalam petak yang sesuai; dan

(c) disimpan di bawah suhu yang disebut dalam undang-undang kecil 33.



**Pencahayaan dan pengalihan udara**

31. (1) Adalah menjadi tanggungjawab seseorang pemegang lesen pasar borong persendirian untuk memastikan bahawa terdapat pencahayaan, pengalihan udara dan bekalan air yang mencukupi di dalam pasar borong persendiriannya sehingga memuaskan hati Pihak Berkuasa Melesen.

(2) Seseorang pemegang lesen pasar borong persendirian hendaklah pada setiap masa memastikan pasar borong persendirian dialihudarakan dengan sepatutnya dan apa-apa pengalihan udara yang secara elektrik atau mekanik hendaklah dijaga dalam keadaan baik dan boleh digunakan dengan efisien.

**Waktu perniagaan**

32. Waktu perniagaan pasar borong persendirian akan ditetapkan dalam syarat-syarat permohonan lesen.

**BAHAGIAN IV****PENGENDALIAN DAN PENYIMPANAN BARANG-BARANG****Kehendak bagi pengendalian dan penyimpanan barang-barang**

33. Semua barang hendaklah dikendalikan dan disimpan dengan mematuhi Akta Makanan 1983 [Akta 281] dan peraturan-peraturan yang dibuat di bawah Akta itu dan mengikut kehendak yang berikut:

- (a) semua barang sejuk beku hendaklah disimpan secara berterusan pada suhu di bawah takat beku  $18^{\circ}\text{C}$  dan tidak boleh dinyahsejuk beku sebelum dijual;
- (b) perkakas, bungkusan atau apa-apa benda lain yang digunakan bagi menyimpan barang-barang hendaklah bersih dan tahan warna;
- (c) kertas atau bahan yang tidak bersih dan tidak tahan warna tidak boleh digunakan untuk membungkus barang-barang;
- (d) daging atau ikan sejuk beku hendaklah dijual dalam keadaan sejuk beku pada suhu di bawah takat beku  $18^{\circ}\text{C}$ ;
- (e) daging dan ikan segar hendaklah didedahkan untuk jualan pada suhu tidak melebihi daripada  $2^{\circ}\text{C}$ ;
- (f) semua alat, bungkusan atau bekas yang digunakan untuk membungkus buah dan sayur tidak boleh dibuat daripada bahan yang akan mencemarkan atau menukar warna atau rasa buah atau sayur itu, atau menyebabkan buah atau sayur itu dalam keadaan yang memudaratkan kesihatan;

- (g) daging atau ikan tidak boleh dipamerkan untuk jualan selama lebih daripada empat jam melainkan jika daging atau ikan itu ditempatkan di dalam suatu kotak sejuk pada suhu tidak lebih daripada 2°C;
- (h) sayur atau buah hendaklah dibungkus sedemikian cara bagi memastikan bahawa terdapat pengalihan udara yang mencukupi di dalam bungkusan itu supaya wap tidak kelihatan di dalam bungkusan itu;
- (i) sayur dan buah hendaklah segar dan tidak dinyahhidratkan, dan tidak boleh bertukar warna atau rosak;
- (j) sayur dan buah tidak boleh dipamerkan atau didedahkan untuk jualan selama lebih daripada empat jam melainkan jika sayur atau buah itu diletakkan dalam suatu persekitaran yang terkawal sebagaimana yang dikehendaki bagi mengekalkan kesegarannya;
- (k) semua bungkusan, alat atau bekas yang telah digunakan terdahulu hendaklah dibasuh sebelum bungkusan, alat atau perkakas itu digunakan semula untuk menghantar atau membungkus barang-barang untuk jualan; dan
- (l) semua bejana, alat, bungkusan atau bekas yang digunakan bagi mengisi makanan basah atau makanan cepat rosak hendaklah mempunyai permukaan yang licin dan kalis air.

## BAHAGIAN V

### PELBAGAI

#### **Lesen hendaklah dipamerkan**

34. Semua lesen yang dikeluarkan di bawah Undang-Undang Kecil ini hendaklah pada setiap masa dipamerkan di bahagian yang mudah dilihat di tempat perniagaan dan lesen itu hendaklah dikeluarkan untuk pemeriksaan dan apabila dikehendaki oleh Majlis atau pegawai yang diberi kuasa.

#### **Penjualan barang-barang yang tidak menyihatkan, dsb. tidak dibenarkan**

35. (1) Seseorang tidak boleh menjual atau menawarkan untuk jualan di pasar borong awam dan pasar borong persendirian apa-apa barang yang tidak menyihatkan, busuk dan tidak sesuai dimakan oleh manusia.

(2) Mana-mana pegawai yang diberi kuasa atau Pegawai Kesihatan boleh memeriksa, meneliti atau menyita apa-apa barang yang tidak menyihatkan, busuk dan tidak sesuai dimakan oleh manusia dan boleh memusnahkan barang-barang tersebut.

#### **Kacau ganggu**

36. Tiada seorang pun boleh menyebabkan apa-apa kacau ganggu di mana-mana pasar borong awam dan pasar borong persendirian.

### Pemeriksaan kesihatan

37. (1) Pihak Berkuasa Melesen boleh pada bila-bila masa mengarahkan supaya mana-mana pemegang lesen, penama atau pembantu menjalani pemeriksaan kesihatan.

(2) Pemeriksaan kesihatan sedemikian hendaklah dijalankan oleh seorang Pegawai Kesihatan yang dilantik atau diluluskan oleh Majlis.

(3) Jika mana-mana orang yang diperiksa sedemikian didapati oleh Pegawai Kesihatan itu menghidap penyakit berjangkit atau infeksi atau apa-apa penyakit kulit yang berbahaya atau pada pendapat Pegawai Kesihatan itu, berkemungkinan menjadi punca infeksi, Majlis hendaklah dengan serta-merta tidak membenarkan orang yang menghidap penyakit itu daripada mengendalikan barang-barang atau melibatkan diri dalam apa-apa aktiviti pasar borong awam dan pasar borong persendirian sehingga suatu masa Pegawai Kesihatan itu mengesahkan bahawa orang itu telah sembuh atau tidak lagi berkemungkinan menjadi punca infeksi.

(4) Mana-mana orang yang—

(a) enggan menjalani pemeriksaan perubatan apabila diarahkan berbuat demikian; atau

(b) setelah menjalani pemeriksaan perubatan tidak dibenarkan di bawah perenggan (3) dan tidak mendapat pengesahan daripada Pegawai Kesihatan bahawa orang itu telah sembuh,

tidak boleh terus bekerja di mana-mana pasar borong awam dan pasar borong persendirian.

### Orang yang dilarang

38. Seseorang yang—

(a) menghidap penyakit yang boleh merebak;

(b) merupakan pembawa apa-apa penyakit infeksi;

(c) menghidap apa-apa penyakit yang menyebabkan keluarnya nanah atau serum dari mana-mana bahagian badan atau penyakit kulit yang lain;

(d) mempunyai sebab untuk mempercayai atau mensyaki bahawa dia berkemungkinan menyebarkan organisme pembiak penyakit; atau

(e) ada membuat perhubungan dengan mana-mana orang yang menghidap penyakit yang boleh merebak,

tidak boleh menjual atau menawarkan untuk jualan atau mengendalikan apa-apa barang di pasar borong awam dan pasar borong persendirian.

**Kebersihan**

39. Seseorang pemegang lesen, penama atau pembantu—

(a) gerai di pasar borong awam; atau

(b) pasar borong persendirian,

hendaklah memastikan bahawa tempat perniagaannya dan perkakas lain yang berhubungan dengan perniagaannya dalam keadaan bersih dan baik pada setiap masa.

**Kebersihan diri**

40. Mana-mana orang yang melibatkan diri dalam penjualan barang-barang di pasar borong awam dan pasar borong persendirian hendaklah memastikan dirinya dalam keadaan bersih pada setiap masa.

**Penyediaan tong sampah dan pelupusan sampah**

41. Tiap-tiap pemegang lesen pasar borong awam dan pasar borong persendirian hendaklah menyediakan—

(a) tong atau bekas sampah yang mencukupi daripada apa-apa jenis dan saiz sebagaimana yang diluluskan oleh pihak berkuasa yang berkenaan bagi pelupusan sampah dan tong atau bekas sampah itu hendaklah dilapik dengan beg plastik; dan

(b) takungan khas sebagaimana yang diluluskan oleh pihak berkuasa yang berkenaan bagi melupuskan semua sampah pepejal yang busuk atau basah atau apa-apa bahan kosong yang lain dan hendaklah melupuskan atau memusnahkannya mengikut arahan pihak berkuasa yang berkenaan, pegawai yang diberi kuasa atau Pegawai Kesihatan.

**Racun perosak dilarang**

42. (1) Seseorang tidak boleh menyediakan, membawa masuk atau menyemburkan apa-apa racun perosak di mana-mana bahagian pasar borong awam dan pasar borong persendirian atau bilik sejuk kecuali dengan kebenaran Pihak Berkuasa Melesen, pegawai yang diberi kuasa atau Pegawai Kesihatan.

(2) Pihak Berkuasa Melesen, pegawai yang diberi kuasa atau Pegawai Kesihatan boleh, pada bila-bila masa setelah memberikan notis bertulis kepada pemegang lesen pasar borong awam dan pasar borong persendirian, memasuki mana-mana pasar borong awam dan pasar borong persendirian untuk membuat apa-apa kerja bagi membinasakan atau membuang apa-apa makhluk perosak di pasar borong awam dan pasar borong persendirian.



(3) Bagi maksud menjalankan kerja yang dinyatakan dalam perenggan (2), Pihak Berkuasa Melesen, pegawai yang diberi kuasa atau Pegawai Kesihatan boleh mengarahkan pemegang lesen pasar borong awam dan pasar borong persendirian untuk mengambil apa-apa langkah untuk mengelakkan barang-barang di pasar borong awam dan pasar borong persendirian daripada dicemari oleh racun perosak dan pemborong dan pemegang lesen pasar borong awam dan pasar borong persendirian hendaklah mematuhi arahan yang diberikan oleh Pihak Berkuasa Melesen, pegawai yang diberi kuasa atau Pegawai Kesihatan.

### **Tiada tanggungan atas pegawai**

43. Tiada apa-apa tanggungan boleh dikenakan ke atas Pihak Berkuasa Melesen, mana-mana pegawai yang diberi kuasa atau Pegawai Kesihatan kerana apa-apa kerugian atau kerosakan yang berbangkit dari perjalanan kuasa-kuasa yang sah di bawah Undang-Undang Kecil ini dan pegawai itu tidak boleh dikenakan apa-apa jua tindakan, dakwaan, tanggungan atau tuntutan apa juga pun yang berbangkit dari perjalanan kuasa-kuasa tersebut yang sah.

### **Mengkompaun kesalahan**

44. (1) Mana-mana kesalahan di bawah Undang-Undang Kecil ini boleh dikompaun oleh Datuk Bandar, Yang Dipertua atau pegawai yang diberi kuasa.

(2) Jumlah wang yang boleh dikutip bagi mengkompaun kesalahan di bawah Undang-Undang Kecil ini tidak boleh melebihi tiga ratus ringgit.

### **Penalti**

45. Mana-mana orang yang melanggar mana-mana peruntukan Undang-Undang Kecil ini adalah melakukan sesuatu kesalahan dan apabila disabitkan boleh didenda tidak melebihi dua ribu ringgit atau dipenjarakan selama tempoh tidak melebihi enam bulan atau kedua-duanya.

## **JADUAL**

### **FI**

## **UNDANG-UNDANG KECIL PASAR BORONG**


(undang-undang kecil 4, 7, 11, 12 dan 21)

1.	Lesen pasar borong awam	... ..	Tidak melebihi RM50.00 setiap satu meter persegi setahun
2.	Pemindahan gerai	... ..	Tidak melebihi RM1000.00
3.	Lesen gantian	... ..	Tidak melebihi RM300.00 setiap lesen




- |   |     |     |   |
|---|-----|-----|---|
| 4. Memasukkan butir-butir penama ke dalam lesen | ... | ... | Tidak melebihi RM500.00 setiap permohonan                 |
| 5. Lesen pasar borong persendirian              | ... | ... | Tidak melebihi RM100.00 setiap satu meter persegi setahun |


Diperbuat oleh Pihak Berkuasa Tempatan di Negeri Kedah seperti berikut:

  
 Dato' Haji Mohd Zohdi bin Saad  
 Datuk Bandar  
 Majlis Bandaraya Alor Setar


Bertarikh: 10-9-2017

  
 Norizan bin Khazali  
 Yang Dipertua  
 Majlis Perbandaran Sungai Petani


Bertarikh: 29-10-2017

  
 Haji Rohaizad bin Rashid  
 Yang Dipertua  
 Majlis Perbandaran Kulim


Bertarikh: 29-10-2017

  
 Haji Abdul Bari bin Abdullah  
 Yang Dipertua  
 Majlis Perbandaran Langkawi

Bertarikh: 26-9-2018

  
 Mohd Fisol bin Md Noh  
 Yang Dipertua  
 Majlis Daerah Kubang Pasu


Bertarikh: 27-9-2017

  
 Datuk Haji Md Shuhaime bin  
 Abdul Rahman  
 Yang Dipertua  
 Majlis Daerah Baling

Bertarikh: 27-9-2017

  
 Haji Mohd Yusri bin Hj. Md Daud  
 Yang Dipertua  
 Majlis Daerah Yan

Bertarikh: 31-10-2017

  
 Zaid bin Ahmad  
 Yang Dipertua  
 Majlis Daerah Pendang

Bertarikh: 26-10-2017




.....  
Dato' Nawadzir binti Hj Abdul Ghani  
Yang Dipertua  
Majlis Daerah Sik

Bertarikh: 1-10-2017



.....  
Datuk Haji Fathullah Suhaimi bin  
Haji Ismail  
Yang Dipertua  
Majlis Daerah Padang Terap

Bertarikh: 26-9-2017



.....  
Haji Mohd Fauzi bin Mustaffa  
Yang Dipertua  
Majlis Daerah Bandar Baharu

Bertarikh: 1-10-2017



.....  
Syed Khairol Anuar bin  
Syed Abidin  
Yang Dipertua  
Pihak Berkuasa Tempatan  
Taman Perindustrian Hi-Tech Kulim

Bertarikh: 30-10-2017

Disahkan oleh Majlis Mesyuarat Kerajaan Negeri pada 16 Januari 2019.  
[PSU(K) 98-1396 Jld. 23 SK. 11]

HAJI IQBAL BIN AHMAD  
*Setiausaha*  
*Majlis Mesyuarat Kerajaan Negeri*  
*Kedah Darul Aman*